



國朝典彙卷之一百二十八

益

都察院右僉都御史

臣

徐學聚

編輯

浙江衢府推官

臣

伍承憲

訂正

禮部二十六

科目

吳元年三月定文武科取士之法先是令有司每歲舉賢才及武勇謀畧通曉天文之士其有兼通書律廉吏亦得薦舉得賢者賞濫舉及蔽賢者罰至是復下令曰上世帝王創業之際用武以安天下守成之時講武以威天下至於經綸撫治則在文臣二者不可偏用也古者

人生八歲學禮樂射御書數之文十五學修身齊家治國平天下之道是以周官選舉之制曰六德六行六藝文武兼用賢能並舉此三代治化所以盛隆也茲欲上稽古制設文武二科以廣求天下之賢其應文舉者察之言行以觀其德考之經術以觀其業試之書筭以觀其能策以經史時務以觀其政事應武舉者先之以謀畧次之以武藝俱求實効不尚虛文然此二者必三年有成有司預爲勸諭民間秀士及智勇之人以時勉學俟開舉之歲充貢京師其科目等第各出身有差

洪武三年五月詔設科取士詔曰朕聞成周之制取才

貢士故賢者在職漢唐及宋科舉取士各有定制然但貴詞章而不求德藝之實前元依古設科待士而權家勢要結納奔競輒竊仕祿賢者恥與竝進甘隱山林風俗之弊一至於此今朕統一華夷願得賢人君子用之自今年八月爲始特設科舉以取懷才抱道之士務在經明行脩博通古今名實相稱其中選者朕將親策於廷第其高下待以顯擢敢有奔競夤緣之徒坐以重罪五經義限五百字以上四書義限三百字以上論亦如之策惟務直述不尚文藻限一千字以上其高麗安南占城等國如有經明行修之士各就本國鄉試許貢赴

京師會試不拘額數選取遣使頒詔知之
遣使頒科舉詔於高麗安南占城

八月京師及各行省開鄉試自初九日始試初場後三日
試第二場又三日試第三場京師直隸府州額百人河
南山東山西陝西北平福建江西浙江湖廣各四十人
廣東廣西各二十五人若人才衆多之處不拘額數若
不能及數者亦從之考試之法大略損益前代之制初
場本經義及四書義各一道第二場論一道第三場策
一道中式者後十日復以五事試之曰騎射書算律騎
觀其驅馳便捷射觀其中之多寡書通於六義算通於
九法律觀其決斷

以御史中丞劉基治書侍御史秦裕伯爲京畿主考官翰
林院侍讀學士詹同弘文館學士睢稼起居注樂韶鳳
尚寶司丞吳潛國史編修宋濂爲同考官就試者一百
二十三人中式者七十二人未及會試悉授官有爲監
察御史者

按是年庚戌開鄉試明年辛亥會試是年天下亦舉鄉
試又明年壬子連舉鄉試江西吳伯宗辛亥狀元也解
學士文有曰家君以洪武四年辛亥主考江西蓋會鄉
是歲同舉解江西人遂主江西試事又臨江先哲錄云

洪武五年八月禮部侍郎曾魯奉 旨考京畿鄉試則
辛亥壬子鄉試可據也

按洪武元年乃戊申以辰戌丑未論爲殿試則當在庚
戌是也故蘇州錢氏世譜庚戌安大全爲狀元始蘇誌
又以爲金壽殊不知當時求才之悉一年二三開科也
如乙丑之榜花倫又有丁顯是春秋二次矣且或每年
或間一年亦不可知登科錄以爲自四年始則爲辛亥
而非子午卯酉之期是國初不可以今日論也

四年辛亥二月 上謂省臣曰今天下已定致治之道在
於任賢旣設科取士合各行省連試三年庶賢才衆多
而官足任使也自後則三年一舉著爲定例以禮部尚
書陶凱前翰林院侍讀學士潘廷堅爲會試主考官

三月 親策會試中式舉人俞友仁等於奉天殿賜吳伯
宗等一百二十人進士及第出身有差是科高麗金濤
中三甲第五授東昌安丘縣丞林實卞伯儒皆不第三
人以不通華言請還本國詔給道里費送歸伯宗授禮
部員外郎

外國人進士是科入試者三金濤高麗之延安人也歸
爲其國相景泰五年甲戌進士黎庸交趾清威人阮勤
多翼人勤仕至工部左侍郎天順四年庚辰阮文英慈

國朝典彙卷二十八 科目
山人何廣扶寧人成化五年己丑王京嘉靖二年癸未
陳儒俱交趾人儒仕至右都御史

始令進士釋褐行釋菜禮

五年正月 命禁下第舉人不許撻拾主司 上謂禮部
臣曰近代舉人不中程式多不省己自脩以圖後進往
往撻拾主司細故謗毀以違私忿禮讓廉恥之風不立
今後有此者罪之

六年二月 命罷科舉諭中書省臣曰朕設科舉以求賢
務得經明行修文質相稱之士以資任用今有司所取
多後生少年觀其文詞亦若可用及試用之不能措諸
行事朕以實心求賢而天下以虛文應朕朕非朕責實求
賢之意也今各處科舉宜暫停罷別令有司察舉賢才
必以德行為本文藝次之庶幾天下學者知所嚮方士
習歸於務本

按是年罷科舉專用辟薦其目有經明行脩有懷才抱
德有賢良方正有人才有孝廉羣舉於朝而各省貢士
皆令卒業太學以次除用蓋罷進士之科者十有二年
時既不喜文士又以初立辟薦法行之甚嚴每舉者至
京 上親校閱不稱旨輒坐舉主往往有謫戍者至洪
武十七年復開科今魁星圖下列諸狀元姓名有洪武

九年狀元張顯宗謬矣

十五年八月 詔禮部設科舉取士合天下學校三年一試著爲定例

十七年甲子三月頒行科舉成式凡三年大比子午卯酉年鄉試辰戌丑未年會試舉人不拘額數從實克貢鄉試八月初九日第一場試四書義三道經義四道每道各三百字以上未能者許各試一道四書義主朱子集註經義詩主朱子集傳易主程朱傳義書主蔡氏傳及古註疏春秋主左氏公羊穀梁胡氏張洽傳禮記主古註疏十二日第二場試論一道三百字以上判語五條

詔誥章表內科一道十五日第三場試經史策五道未能者許減其二俱三百字以上次年禮部會試以二月初九日十二日十五日爲三場所考文字與鄉試同鄉試直隸府州縣則於應天府在外府州縣則於各布政司其舉人則國子學生及府州縣學生員之學成者儒士之未仕者官之未入流者皆由有司申舉性資敦厚文行可稱者應之其學校訓導專教生徒及罷閑官吏倡優之家與居父母喪者並不許入試其中式者官給廩傳送禮部會試

按洪武開科詔五經皆主古註疏及易兼程朱書蔡詩

朱春秋左公羊穀梁程胡張禮記陳乃後盡棄註疏不知始何時或曰始於頒五經大全時以爲諸家說優者采入故耳然古註疏終不可廢也

十八年乙丑二月命翰林待詔朱善典籍聶鉉主考禮闈撤棘取中式舉人黃子澄等四百七十二人

三月策試舉人以第一甲進士及第丁顯等爲翰林院脩撰第二甲進士出身馬京爲編脩吳文爲檢討第三甲賜同進士出身危瓛爲衛府紀善李鴻爲潭府奉祀正其諸進士上以其未更事欲優待之俾之觀政於諸司給以所出身祿米候其諳練政體然後擢任之其在

翰林院承勅監等近侍衙門者采書經庶常吉士俱稱爲庶吉士其在六部及諸司者仍稱進士

是科練子寧對策極言今日朝廷用人徇其名而不求其實以小善而遽進之以小過而遽戮之因歷陳古人所以教養任用之道言甚剴切不顧忌諱上嘉之擢第二又得黃子澄後靖難師起以奸黨戮之仆碑削籍

是年會試黃子澄第一練子寧次之花綸又次之綸漸江解元也及廷試綸第一子寧次之子澄又次之旣啓封上自以夢故用丁顯爲狀元子寧如故綸第三抑

子澄三甲爲庶吉士然三人俱授修撰何亦擢子澄爲修撰云見刻丁顯策者僅三百字稱上爲上位餘多不成語

是歲沈潛楊靖咸受上知不兩歲至兵刑部尚書而皆不克終蹇瑤改名義授中書舍人滿九載潛靖死後始進官而爲吏部尚書者三十四年僉憲登科考名姓次序俱以會試錄爲准然不載楊靖蹇瑤其脫畧可知矣

二十一年戊辰以編修蘇伯衡李叔荆主會試取中式舉人施顯等九十九名

三月 上御奉天殿策試舉人賜任亨泰唐震盧原質等九十七人進士及第出身有差特命立石題名於太學著爲令亨泰襄陽人 上命有司建狀元坊以旌之聖旨建坊自此始

按洪武初翰林院官皆由薦舉未有進士入者是以辛亥科狀元止授員外郎榜眼探花並授主事至乙丑科始以一甲三名並授修撰二甲馬京等授編修吳文等授檢討及是科又以狀元爲修撰榜眼探花爲編修著爲令獨洪武丁丑覆試探花焦勝授司副建文庚辰胡廣等三人並授修撰餘皆如此科之例至今不改云

國朝典彙卷二百二十八 科目
廷試罷對策不稱旨者二人

介諸儒撰疑信論 上召考試官陳宗順等坐武英門
賜食諭之曰今日觀列子鄰子竊鈇之事因思人之信
疑皆生於心信心常出於忠厚疑心必起於偏私夫信
其所好疑其所惡乃人之常情是故不可不察也君之
於臣好而信之讒言雖至而不入惡而疑之毀謗不召
而自來苟能以大公至正之心處已待人則自無獨信
偏疑之私其或反乎公道而不得好惡之正未有不流
於一偏者也惟能好其所當好惡其所當惡信其所當
信而疑其所當疑則人無浸潤之讒形似之感矣又論
五性之德 上曰小惠非仁小節非義足恭非禮苛察
非知諒而不貞不可謂之信因給紙筆令諸儒撰疑信
論

二十三年八月賜應天試官傅箕蘇伯衡謝南毛瀚鈔各
十錠中式舉人黃文史等五十人各二錠不中者各二
貫且諭以進學之方俾無怠無忽

二十四年辛未三月 上御奉天殿策中式舉人賜許觀
張顯宗吳言信等三十一人進士及第出身有差觀貴
池人鄉會試俱第一後復姓黃

按顯忠錄謂觀庚午鄉試三十一名池州府志亦云洪

武庚午科舉人會試廷試俱第一人而 皇明通紀乃云庚午解元不知何據考庚午解元爲黃文史則非許觀可知

擢下第舉人張孟鏞等爲主事

二十七年甲戌三月 上親發策會試中式舉人彭德等一百人賜張信戴德彞景清等進士及第有差 信浙江定海人官至侍讀以教韓王寫杜詩含譏刺及勅藁削御製二語得罪復以丁丑考試事誅

三十年丁丑二月會試命翰林院學士劉三吾吉府紀善白信蹈爲考試官取宋琮等五十一人廷試賜閩縣陳郊爲首吉安尹昌隆會稽劉諤次之時大江以北無登第者下第諸生上疏言三吾等南人私其鄉 上怒命

儒臣再閱落卷中文理長者第之於是侍讀張信侍講戴彞右贊善王俊華司直郎張謙司經局抄書嚴叔載正字董貫長史黃章紀善周衡蕭楫及郊昌隆諤各閱十卷或言劉白驤信等以陋卷進呈 上益怒親策問

擢韓克忠王恕焦勝等六十一人及第有差皆山東山西北平河南陝西四川士也授克忠翰林脩撰恕編修勝行人司副進士陳性善爲行人陳誠爲檢討考官張信等俱磔殺之三吾以老戍郊諤安置威虜唯戴彞尹

昌隆得赦尋取郊謬回爲司賓司儀署丞復殺之宋琮
拜御史後以檢討掌助教致仕

按登科考云世稱春夏榜以此又謂之南北榜郊等伏
法削籍故今但有克忠榜而郊榜不可考矣若會試錄
則猶存也

命禮部乙榜舉子署教諭訓導年未三十不願署教者聽
按永樂四年傳臚之明日進所選副榜士臨軒策之擢
周翰等三人進學翰林餘俱付吏部除學官宣德間副
榜舉人得冠帶讀書太學蓋循此制自是至正統後副
榜始不復延試矣

三十一年二月再試寄監下第舉人中式者四百一十五
名次其等第除教授教諭訓導不中者八十七人爲縣
吏目

建文二年庚辰二月詔禮部尚書陳廸右侍郎黃觀知貢
舉翰林學士董倫太常少卿高遜志充考試官右拾遺
朱逢吉史官吳勤葉惠仲趙友士徐旭張秉彝爲同考
試官御史王度俞吉士爲監試官取吳溥等一百十八
人

三月策試禮部中式舉人賜胡靖王艮李貫等一百一十
人進士及第出身有差以靖等三人竝授翰林修撰廷

國朝典彙卷之二十八 科目
試策良最優以貌不揚且靖策有親藩陸梁人心搖動之語稱旨遂易靖第一靖初名廣 上特爲易名後復名廣與同榜楊榮金幼孜楊溥胡濙顧佐陳洽皆爲永樂時名臣唯良死建文之難良貫皆吉水人貫獨不類君子恥之

永樂元年禮部奏壬午年兵革未舉鄉試請以今年秋八月補試 詔行之

八月 命翰林院侍讀胡廣編修王達考應天鄉試賜宴於本府

二年甲申禮部奏請會試選士之數 上問洪武中所選幾何尚書李至剛對曰各科不同多者四百七十餘人少者三十人 上曰朕卽位初取士姑率其多者後不爲例又曰學者成材亦難當取其大略其細如十分中有一二分語疵而不害理亦可備數然科舉是國家取人材第一路不可濫且文體毋尚虛浮惟取朴實

二月會試 命侍讀學士解縉侍讀黃淮爲考試官取禮樂制度爲問欲以求博洽之士唯曾棨卷記獨詳 上喜御批貫通經史識達天人有講習之學有忠愛之誠擢魁天下昭我文明尚資啓沃惟良顯哉第二第三人周述周孟簡從昆季也亦皆有御批褒許之辭至謂兄

弟齊名古今罕比授修撰編修等官仍於二甲擇文學
優長楊相等五十一人及善書湯流等十人俱改翰林
庶吉士進學賜祭與述孟簡羅衣各一襲

六月又命翰林院試下第舉人張鉉等六十一人召見皆
賜冠帶命於國子監進學以俟後科且勉以立志謂爾
等學已有根但更百尺竿頭進步爾後科第一甲人有
不在爾曹者乎至次年正月復命學士縉等試庶吉士
楊相劉子欽彭汝噐王英王直余鼎章敞王訓柴廣敬
王道熊直陳敬宗沈升洪順章朴僉學夔羅汝敬盧翰
湯流李時勉段民倪惟哲袁天祿吾紳楊勉及榮等二
十八人於文淵閣肄業時人謂之二十八宿進士周忱
自陳年少願進學 上喜曰有志之士也命增入之司
禮監月給筆墨紙光祿寺給朝暮膳禮部月給膏燭鈔
人三錠工部擇近第宅居止是歲人知選二十八人不
知初爲六十一人也

按是科進士四百七十二人得陳敬宗周忱新進士李
衝自言臣父洪武中得罪死於法臣不當違令干進
上曰古之聖人亦有罪其父而用其子者但爲子能改
父行致顯聞於世足以爲賢若以父死非命終身不仕
亦未必合中道爾能力學進用雖違令而志可嘉朕不

爾罪而其勉之

三年各省復開鄉試

四年二月命侍講學士王達洗馬楊溥主會試取中式舉人朱縉等二百二十人

三月壬寅 上御奉天殿試禮部中式舉人二百一十九人賜林環陳全劉素等進士及第出身有差命國子監立石題名 上慮禮部下第舉人中或有遺才復親試之得文學優等二十一人各賜冠帶

是年進所選副榜士擢周翰等三人進學翰林餘俱付吏部除學官

五年禮部選國子生蔣禮等三十八人隸翰林院習譯書遇開科仍令就試置館於長安右門之外處之

七年二月命侍講鄒緝左春坊司直徐善述主會試取中式舉人陳璠等八十四人

時御史劾出題孟子節文尚書洪範九疇偏題詔緝等俱下獄

九年三月賜進士蕭時中苗衷黃暘等八十四人及第出身有差七年己丑當廷試會 上巡狩北京詔禮部以七年己丑會試天下舉人璠等寄監讀書至是臨軒親策時中賜冠帶銀幣餘竝賜鈔五錠宴於會同館命工

國朝典彙卷三十八 和月
部建題名碑於國子監

取下第舉人熊槩金庠等十餘人寄國子監給冠帶

皇太子以副榜第一人孔諤爲左春坊左中允賜出身

十年二月命禮部尚書呂震諭考官諭德楊士奇金幼孜精選試卷諭曰數科取士頗多不免玉石雜進今取毋過百人其務精選收散木累百不若得良材一株也是年取中式舉人林誌等一百人

三月 上親策禮部中式舉人一百六人賜馬鐸林誌王鈺等進士及第出身有差仍賜宴於會同館

十三年三月 上御奉天殿閱舉人對策賜進士三百五十一人是年始詔天下舉人會試於北京命翰林院修撰梁潛王洪爲考試官初拆卷得第一名曰陳循其鄉人也避嫌改置第二而擢林文祜旣又以祜字難識進呈不便因見第五名洪英曰此洪武英才也取爲第一改循第二第五名王翱者鹽山人也 上喜得畿輔士以布衣召見賜酒食旣廷試復賜陳循及李貞陳景著及第賜宴於畱守行後軍都督府景著時年十八改進士洪英王翱林文祜等俱爲庶吉士

時鴻臚寺無卿丞張斌任事恃城守功最狠戾多所中傷人頗憚之以不與讀卷致爭論 上前不已御史黃

國朝典彙卷一百三十一 科目
宗載奏斌不學無識不可以讀卷乃敢煩瀆 聖聽當
伏法士論壯之

按是科五魁有兩書經在第二第三實六魁云而第五
第六竝儒士

上以禮部會試下第舉人中或有學問可取者命翰林院
再試之續取二十四人竝賜冠帶給教諭俸送國子監
進學以待後科

十六年戊戌二月命侍讀學士曾榮侍講王英主會試取
中式舉人董璘等二百五十人

三月 上御奉天殿策士賜李騏劉江鄧真等進士及第
有差騏初名馬 上爲改之

勅進士年二十以下者遣歸本學肄業皆預注擬其官待
缺取用

十八年六月 命禮部自今科舉取士在大誥律例內出
題試諸生

十九年 命春坊大學士楊士奇侍講周述主會試取中
式舉人陳中等二百名

三月 上御奉天殿試禮部中式舉人賜曾鶴齡劉矩裴
綸等及第出身有差

二十二年甲辰二月翰林院侍講學士曾榮侍讀余鼎爲

考試官取中葉恩等廷試賜邢寬梁禋孫曰恭及第初
上已取第一孫曰恭嫌其名近暴曰孫暴不如邢寬遂
擢寬第一仍用朱書填黃榜一時稱異事云

是科中式
百五十人

洪熙元年四月鄭府審理僉廷輔言進賢之路莫重於科
舉近年賓興之士率記誦虛文爲出身之階其實才十
無二三使之臨政往往束手無爲職事廢隳民受其殃
自今各處鄉試乞令有司先行審訪務通今博古行止
端重者許令入試比試則務選其文辭典雅議論切實
者進之會試尤加慎選庶幾士務實學而國家有得賢
之益 上諭禮部曰所言當理其卽行之又曰科舉之
士須南北兼收南人雖善文詞而北人厚重近累科所
選北人僅得什一非公天下之道自今科場取士南取
六分北取四分爾等其定議各布政司名數以聞

九月令會試分南北取士 上嘗言科舉多弊須革楊士

奇對曰科舉須兼取南北士 上曰北人學問遠不逮

南人對曰自古國家兼用南北士長才大器多出北方

南人有文多浮 上曰然將何試之對曰試卷例緘其

姓名請今後於外書南北二字如一科取百人南取六

十北取四十則南北人才皆入用矣 上曰北士得進

則北方學者亦感發興起往年只緣北士無進用者故

怠惰成風其與蹇義夏原吉及禮部計議以聞會宮車晏駕 宣宗皇帝遂行之

宣德元年定取士額數南京國子監并南直隸共八十名北京國子監并北直隸共五十名江西五十名浙福各四十五名湖廣廣東各四十名河南四川各三十五名陝西山東山西各三十名廣西二十名雲南十名貴州願試者就試湖廣

是年 上親征漢王順天不及鄉試

二年丁未二月命太常卿兼學士楊溥左春坊大學士會榮爲主試官得士趙鼎等一百人

時行在禮部尚書胡濙請以三月初一日臨軒策士

上曰設科求賢國家大事昔之爲君尚有祝云願得忠孝之人以資國用今朕之心亦如此濙對曰 陛下心存用賢且養之有素必有可以當 聖心者

三月 上御奉天殿策試舉人 上旣發策退御左順門謂翰林儒臣曰國家取士科目爲先所貴得真才以資任用古人取士於鄉其行藝素有定論至朝廷復辨其官才所以得人爲盛後世惟考其文學欲盡得真才難矣然文章論議本乎學識有實學者其言多剴切無實見者其言多浮靡唐虞取士亦嘗敷奏以言况士習視

國朝典彙卷之三十一
朝廷所尚朝廷尚典實則士習日趨於厚朝廷尚浮華則士習日趨於薄此在朝廷激勵成就之有道也爾等其精擇之朕將親覽焉 上親閱舉人所對策賜進士馬愉杜寧謝璉等一百一人

按愉山東臨朐人楊士奇云宣德以前皆南北士合試未有北士居首選者有之自馬愉始

命進士永新江玉琳等九十六人歸家進學

四年命貴州附試雲南雲南鄉試增五名已後止稱雲南而貴州在其中矣

五年庚戌二月春坊大學士王英行在翰林院侍讀錢習禮主會試取中式舉人陳詔等一百人 是科五魁有兩書經

三月 上御奉天門策士 上臨軒發策畢退御武英殿謂翰林儒臣曰朕於取士不尚虛文欲得忠鯁之士爲用其間有若劉蕡蘇轍輩能直言抗論庶幾所望朕當顯庸之於是賦策士歌以示諸讀卷官云是科賜林震龔錡林文等進士及第有差宴於行在中軍都督府

六年 上因應天題請考官謂禮部尚書胡濙等曰考官取士但據文章不悖經意即可充選然應舉之人皆憑學棹有司保送其人果孝弟忠信而又通古今科目取

之足爲世用若德行不修而徒有文辭亦終無益

七年三月大通關提舉司吏文中自陳臣廣東瓊州府儋州昌化縣學生永樂二十一年鄉試中式因病未及會試繼丁母憂宣德六年八月至部以違限克吏切思海外之人本圖光顯今乃論謫爲吏伏望聖恩矜念上命禮部試驗其文可取命復舉人候下科會試

命順天解額取八十名

九月順天府尹李庸檢舉科場詐冒事御史包德懷給事中虞祥等劾奏庸及監試等官御史梁廣成等罪上

命姑宥之已而顧侍臣曰科舉求賢國家重事於此而不用心他事可知已御史給事中所劾本不可宥但念斯事因庸覺察不然奸弊不克露矣

八年癸丑命致仕武英殿大學士黃淮少詹事王直主會試取中舉人劉哲等一百人

三月廷試賜曹鼐趙恢鍾復等進士九十九人及第出身有差鼐真定晉寧人初舉鄉試中乙榜授代州學正辭不堪爲人師願改別職得泰和典史劇邑政繁處之裕如公暇益進學不倦久之以督部工匠至京疏乞試中會試第二廷試策問羲禹河洛象數對稱旨上親擢爲第一授翰林院修撰爲人明敏疏通楊士奇愛重之

薦入經筵不數年入閣與政

禮部尚書胡濙同大學士楊士奇楊榮選進士六員舉人二十四人以聞 上命吏部改進士爲庶吉士送翰林侍讀學士王直訓督之舉人俱賜冠帶給訓導俸送國子監肄業

按恩榮宴所洪武時無考永樂九年宴於會同館十三年宴於畱守行後軍都督府立石宣德五年宴於行在中軍都督府宣德八年始賜宴於禮部遂爲例

正統元年丙辰少詹事王直侍講陳循爲考試官取中劉定之等廷試賜周旋陳文劉定之及第或云首揆旣取三卷未定問同事者曰有識周旋者否狀何如或曰白而偉蓋疑謂淳安周瑄也遂首旋旣傳臚貌甚寢爲之愕然是科進士一百人

是歲詔增鄉試會試取士額先是祭酒陳敬宗言比者解額有定副榜數少以致天下教官類多缺員吏部遂建議兼考監生補除敎職往往僥倖選列不稱師範竊以爲縱科舉取人之濫猶愈於監生考試之精請量寬解額專取之於副榜庶幾誨道得人賢才無滯於是行在禮部議增會試爲百五十人順天府近已增至八十人其應天浙江等處各增舊額有差 上定順應天滿百

人浙江福建皆六十人江西六十五人河南廣東皆五十人湖廣五十五人山東四川皆四十五人陝西山西皆四十人廣西三十人雲南二十人其監生學業無愧者仍除教職

三年令開科不拘額數

秋八月順天貢院災翰林侍讀學士曾鶴齡主考順天鄉試初試之夕場屋火試卷有殘缺者有司懼罪不敢以更試爲言惟欲請葺場屋以終後兩試鶴齡曰必更試然後滌百弊以昭至公不然雖無所私此心亦欺朝廷可惜一日之費不成此盛舉哉有司具二說以進命下悉如鶴齡所言人皆懾服得殷謙爲解元後爲戶部尚書并宮保李賓都御史王銳芮釗及岳正中會元賜進士第三直內閣號稱得人

四年己未二月命行在禮部侍郎王直學士蘭從善爲

主考官取中式舉人楊鼎等一百人

按從善 弁山別集作錢習禮

三月 上親策會試中式舉人賜進士施槃楊鼎倪謙等及第有差時 上取張和第一使小黃門密至其邸占之以有目眚寘二甲一名

七年壬戌二月以禮部侍郎王英侍讀學士苗衷爲主考官取中式舉人姚夔等一百五十人

按同考官必以京朝官克之制也是科同考則有永新
知縣陳員韜京衛武學教授紀振岐陽教諭彭舉 是
科李森以都察院吏南昱以刑部吏鄭溫以松陵驛丞
皆中式

三月 上親策士賜進士劉儼呂原黃諫等及第有差
九年令在京各衙門吏典承差人等聽本衙門保勘禮部
嚴考通經無犯者送試仍行原籍勘實

十年乙丑命翰林院學士錢習禮侍講學士馬愉爲考試
官取中商輅等一百五十人廷試賜商輅周洪謨劉俊
及第輅浙江解元也本朝中三元者惟輅一人是歲同

考一教授二教諭

按水東日記云是科會試登科錄天字皆稱奠字今考
部本不然以爲葉傳聞之誤葉是科進士豈有誤理或
本部翻刻未可知也廷試讀卷有兵部尚書徐晞戶部
侍郎掌光祿寺奈亨俱吏員也

命副榜及下第九百餘人俱入太學

十二年江陵縣歲貢生員張縈以內府考試懷挾文字
上曰此輩若處以常律不足以警後其謫戍邊衛逃則
殺之著爲令

十三年戊辰以工部侍郎高穀侍講杜寧爲主考官取中

岳正等一百五十名同考有二教諭二訓導

三月殿試賜彭時陳鑑岳正等進士及第出身有差時彭時上表謝恩之夕坐以俟旦隱几不寤竟失朝糾儀御史奏令錦衣衛拿禮部尚書胡濙出班奏狀元彭時不到合令錦衣衛尋上是之

是科雜流中式者舒廷謨係禮部辦事官汪甫係燕山衛小旗李泰係太監李永昌養子拔入翰林官至詹事景泰元年令各衛官舍軍餘曾送入學者許入試

八月翰林侍講學士劉鉉主考順天府鄉試及揭曉第一人劉宣乃盧龍軍士也同事者欲更之鉉爭曰朝廷立賢無方不可乃止時論避之

是年令開科不拘額數應天中二百名內軍生七人二年辛未正月禮部郎中章綸請增會試取士額從之以戶部侍郎江淵修撰林文爲主試官取中式舉人吳滙等二百人是歲知貢舉官胡濙楊寧二尚書同考侍讀劉儼秩尊於林文又有廣東叅政羅崇本教授學正訓導各一員

三月廷試賜進士柯潛劉昇王俱等及第出身有差

時廷策正午忽大風驟起黃塵漲天侍講徐瑄等曰今日譬之人家納婦贅婿而變異若此進士中他日其有

小人僨事者乎良久一貢士紙卷爲風雨颺半空呼之
至乃濟縣王越也云文已成尚有藁底在都給事葉盛
謂御史陳叔紹當入奏庶不誤此生三年叔紹遂執筆
至奏尾思而未得盛曰以全盛典旣而得旨禮部再給
紙卷或云卷墮於朝鮮次歲送還 上喜擢越御史後
越附太監汪直襲破麓川封伯

先是戶科給事中李傑等奏今年會試禮部奏准取士不
分南北臣等切惟江北之人文詞質實江南之人文詞
豐贍故試官取南人恒多北人恒少洪武三十年 高
皇帝怒所取之偏選北人韓克忠等六十一人賜進士

及第出身有差洪熙元年

仁宗皇帝又命大臣楊士

奇等定議取士之額南人十六北人十四今禮部妄奏
變更意欲專以文詞多取南人乞勅多官會議今後取
士之額雖不可拘而南北之分則不可改刑部侍郎羅
綺亦以爲言事下禮部以爲頃者詔書科舉自景泰元
年爲始一遵永樂年間例行本部查得永樂二十年間
凡八開科所取進士皆不分南北已經奏允今傑稱禮
部變更意專以文詞多取南人夫鄉舉里選之法不可
行以取士若不以文考官將何所據且北方中土人才
所生以古言之大聖如周公孔子大賢如曾顏思孟皆

非南人以今言之如靖遠伯王驥左都御史王翱王文
皆永樂間不分南北所取進士今豈可預謂北無其人
况本部止遵詔書奏行卽不曾奏請多取南人少取北
人今各官所言如是乞勅翰林院定議命遵詔書行保
等所言不允

四年順天中式二百五十名內儒士十人翰林院譯字官
一人吏部聽選官一人戶部書算一人工部承差一人
刑部都吏一人衛舍史一人衛吏一人太醫院醫士四
人武生一人軍餘九人衛舍三人軍一人

是年山西試錄內考官徐霖批中庸義云文與人同理與
人異都御史李秉云果若所言則爲蹈襲雷同之文而
有戾指背理之失然此篇文不背理乃霖之不明也

詔治霖罪奪綵帛表裏入官

禮部祠祭司主事周騃言設科取士當遵國法禁例洪武
以來舊例曾由科目出身未入流品官生員發克吏罷
閑官吏監生生員娼優隸卒刑喪過犯之人不許入試
其生員軍生儒士及未入流品官農吏承差軍餘人等
若無錢糧等項粘帶者聽從入試如有不實照例論罪
已中式者黜退不錄未中式者終身不許入試今順天
府景泰四年鄉試取中舉人尹誠汪諧陳益龔滙王顯

李隨李森錢輸俱係冒籍人數於例不該入試似此之徒欲求事君而先欺君今日苟圖如此他日居官可知乞明正其罪以警將來命錦衣衛俱執送刑部問未發露者許出首逮問同學知而不首者同罪今後科場知貢舉監試提調等官務在防範嚴切不許容情冒名換卷截卷傳遞文字并說話作弊監門搜檢巡綽監試官軍敢有如前容隱不舉作弊者俱治以重罪兼外執事官臨期於吏部聽選文學出身者克之

初會試同考官從禮部推選翰林院官京官教官皆得爲之至是禮部尚書胡濙言翰林院及春坊以文藝爲職業宜專其事京官由科第有學行者宜兼取以克教官不許克請著爲令從之

五年甲戌以兵部侍郎兼春坊商輅洗馬兼修撰李紹爲主考官取士彭華等三百二十人是科吳禎以雜流中式黎庸阮勤以交趾人中式

按宣德二年交趾叛十年革交趾布政司未有登進士者至是科乃有之蓋交趾人願留中國者耳

三月廷試賜進士孫賢徐溥徐轄等及第出身有差應天舊無試院每開科借京衛武學爲之學地狹每將儀門牆垣拆毀苦蓋席舍試畢復修至是冬始以府尹馬

諒言以永樂間錦衣指揮紀綱沒官房改造試院

七年二月 詔定各鄉試取士額數累朝取士原無定額
應天如洪武之丙子永樂之乙酉辛卯俱三百名江西
如永樂之甲午等科俱二百名可考也至景泰庚午以
來各處增數過濫如順天景泰庚午癸酉則二百二十
五名應天庚午則二百名癸酉則二百五名至是裁定
兩京各一百三十五名內三十三名取監生五名取雜行
江西九十五名浙江福建皆九十名湖廣八十五名河
南八十名山東廣東各七十五名四川七十名陝西山
西六十五名廣西五十五名雲南三十名

是年從科臣張軾言申禁官員子弟人等於宦所冒籍科
舉

陝西舊無貢院每試士於三皇廟中是年春始以布政許
資奏創今試院

覆試順天中式舉人是年鄉試春坊大學士劉儼侍講學
士黃諫爲考試官時內閣陳循子瑛王文子倫入試俱
不中選循等遂劾奏儼諫二人閱卷不公請如洪武間
罪劉三吾等例重開科考試有旨令翰林院覆閱取中
試卷高穀懼儼等禍不測欲爲申救蚤朝奏事畢出班
跪稱少保臣高穀有事聞上因召至榻前具白真情且

曰大臣子與寒士竝進已不可况又不安於命欲構考官可乎由是儼等得釋特旨欽賜瑛倫舉人許赴會試時謂之欽賜舉人禮科給事中張寧疏切照陳循王文職居輔弼任重經綸所當正已爲人爲上爲下而乃以子之故紛章疊奏煩瀆聰明祇爲私謀不恤國體大臣之道果安在乎臣聞宋范質爲相從子昇求遷秩質作詩戒之曰爾曹當閔我勿使增罪累比之陳循賢否何如也韓億爲相其子雖舉進士不就廷試兼以父任執政爲避比之王文高下何如也沈文通登進士第一馮京第二時以貴胄不可先寒酸乃進京而退文通比今試卷已落而求與中卷比割者得失何如也世之庸人愚婦亦知父不談子之德豈有身爲大臣公然爲其子暴才稱屈於朝廷之上哉卽使才而屈猶不可也况無實之爭何以服天下且今歲順天就試者一千八百餘名而中式者僅一百三十五名劉儼等假使考試未精則其間遺漏者亦未止王倫陳瑛而已若一槩援例求進拒之則情偏從之則弊起是陳循等一舉而壞科目之制矣乞正其罪罷歸田里王倫陳瑛仍照不中發回原籍讀書不報

時陳循王文等言考中譯字官劉淳送試不中爲失舊

制詔儼等回話宥之王文陳循又言出題偏駁犯 宣宗御諱詔禮部同大學士高穀等覆驗取中舉人徐泰等文卷有優於倫瑛者有相等者有不及者又第六名林挺殊卷無批語奏 上有旨劉儼等考試不精罪不容逖但無私弊俱宥之林挺并該房考官俱下錦衣衛獄鞫問情實以聞六科論循王文輔導有年國之元老豈可所奏誠為有理但陳循王文輔導有年國之元老豈可以一事之失而遽加之罪姑貸之少保高穀乞致仕詔卿持正之心嫌疑之情朕已俱悉但館閣之職正當用賢不允所請今後尚加秉忠直以全名節蓋穀面斥文之私而奏全儼等不自安乃有此奏也

按鄉試不第而特許會試者陳瑛王倫也會試不第而特賜廷試者洪武中韓克忠等一榜進士也會試不第免廷試特賜進士出身者孔諤也一云諤授中允未賜進士

洗馬柯潛奉命主考應天鄉試初入境時泊舟淮安有應試生暮夜投潛潛叱之彼以重賂遺前固請潛怒命左右執付有司以法懲之

天順元年丁丑正月詔景泰特賜舉人陳瑛王倫並除名命內閣學士薛瑄通政司叅議兼侍講呂原為主試官得士夏積等三百人

是年會試同考官多出於權貴所薦引及揭曉日錄文謬
誤去取徇情謗議洶洶無名詩詞紛然雜出一排律云
聖主開科取俊良主司迷謬更荒唐薛瑄性理難包括
錢溥春秋欠主張吳節只知貪賄賂孫賢全不曉文章
問仁既是無顏子配祭何如有太王告子冒名當問罪
周公係井亦非常閣老賢郎真慷慨總兵令姪獨軒昂
榜上有名誰不羨至公堂作至私堂蓋內閣許彬之子
許起及石亨之姪石後皆以私取而錄文則論語題節
去顏子起克己復禮爲仁孟義本公都子之言而云告
子故詩中備言之其他招擬祭文不可勝紀時同考則
尚寶少卿錢溥司丞李泰翰林典籍徐秘蓋官制初變
也是科最號嚴整然外人有以此俚語戲者後石後竟
坐亨敗除名及以怨謗剛於市

三月廷試賜黎淳徐瓊陳秉中等進士及第有差

初策題命李賢代草賢因石亨招權納賄文武大臣多出
其門奔競成風不知廉耻禮義爲何物乃以求賢安民
二事問之欲得真才止奔競以正士習云

是年讀卷官徐有貞以武功伯掌內閣王驥以靖遠伯掌
兵部楊善以興濟伯掌鴻臚寺居內閣九卿首亦時制
之變也

二年令兩京天文生陰陽人及官生子弟許就在京鄉試
三年浙江溫州府永嘉縣教諭雍懋言朝廷每三年開科
取士考官出題多摘裂牽綴舉人作文亦少純實典雅
比者浙江鄉試春秋摘一十六股配作一題頭緒太多
及所鏤程文乃太簡略而不純實且春秋爲經屬詞比
事變例無窮考官出題往往棄經任傳甚至參以已意
名雖搭題實則射覆遂使素抱實學者一時認題與考
官相左卽被出斥乞勅自後考官出題舉子作文一惟
明文是遵有不悛者罪之 上善其言命禮部議行

九月詔逮順天考試官學士倪謙下獄謫戍開平以舉子
奏謙受賄陰事也

浙江試場原連杭州府學時以浙江巡按及三司官言士
子赴科累有作弊者請改試場於城東廢倉隙地乃立
今試場

四年庚辰二月以學士呂原尚寶司少卿柯潛爲考試官
取陳選一百五十人時有下第舉人萬經恨同考官修
撰劉宣以同縣人見黜且以李賢弟李讓不中謂賢亦
怒考官遂鼓其說奏考官抄文顛倒宜正其罪 上疑
之召賢問曰此舉人奏考官弊何以處之賢對曰此乃
私忿考官無弊如臣弟讓亦不中可見其公 上乃命

禮部會翰林院考此舉子荒疎且其人狂妄曩三木部前以徇羣議方息

三月廷試賜進士王一夔李永通鄭環等一百五十人及第出身有差

七年癸未命禮部左侍郎陳文尚寶司少卿兼修撰柯潛爲考試官試日大火焚死者九十餘人及主試官俱越牆免上憐之贈死者俱進士出身改試期以八月命太常少卿兼學士彭時侍讀學士錢溥取中吳鉞等

八年甲申廷試賜彭教吳鉞羅璟及第吳後改姓陸是科劉淳以翰林譯字官馬愈以欽天監天文生中式

禮部尚書姚夔請諭祭焚死舉子高潔胡黼涂班曾灝等十餘人於郊從之夔祭畢自責不能致防殃及賢俊拜地慟哭哀震數里觀者以萬數

成化二年丙戌命太常少卿兼學士劉定之翰林學士萬安爲主試官取中章懋等三百五十人

三月上御奉天殿策試賜羅倫及第第一程敏政第二陸簡第三按羅倫吉安永豐人對策引用程伊川語人主一日之間接賢士大夫之時多親宦官宮妾之時少執政欲截去下句倫不從直聲震於時遂奏名第一倫以上疏論閣臣李賢不奔喪久之章懋莊杲黃仲昭

以諫元宵燈火俱得罪外謫時號翰林四諫又是歲會
試五經各刻文三篇二場刻詔商良臣輅子也敏政李
賢壻 時冢宰王一夔以敏政字精楷力薦於李文達
曰宜爲第一李曰論文不論書遂取倫第一而敏政次
之 是科會元狀元咸稱得人內賀欽莊杲韓文熊繡
許進林瀚黃仲昭王繼皆爲名臣從來得人未有如是
科者論者比之唐韓愈榜宋寇準榜云

五年己丑以太常少卿兼學士劉珣侍讀學士劉吉爲主
試官取中費閭等二百五十人

三月 上御奉天殿策試中式舉人賜進士張昇丁溥董
越等及第出身有差

七年五月中書舍人呂憲乞就順天府鄉試從之

八年壬辰命禮部侍郎萬安洗馬江朝宗爲主試官取中
式舉人吳寬等二百五十人

三月 上親策士仍賜吳寬進士第一先是寬屢試於鄉
不利貢入國學絕意仕進不復應舉提學御史陳選禮
聘敦請鄉試遂取第三至是會試殿試皆魁天下不負
科名劉震第二李仁傑第三

舊制殿試在三月初一日狀元率進士上表謝恩在初六
日是年以悼恭太子發引改殿試於十五日至今因之

九年正月北直隸提學閻禹錫奏順天應天兩府鄉試舊制以御史二人監試宜令預於十日前入院庶詳察事端以祛積弊其同考試官宜令所司擇文學優長素行端介者毋循勢要干請搜檢守號宜用在外都司官軍毋遣京營之人庶革其傳遞夾帶之弊至於校文須主考官詳慎將同考官落卷并二三場通行檢閱務得積學之士不許懶慢推託且兩京主考係侍從格心之臣若引嫌畏避卽內不足者隨當罷黜試錄就刻舉人文字不許主考代作以妨校閱詔從之

十年八月左庶子黎淳主考順天府鄉試初場得一優卷及觀後場絕不相類疑有弊勾稽墨卷果得謄錄生截卷狀移簾外按其事而取優卷爲第一拆封乃馬中錫亦一時名士時學士謝一夔主考應天府鄉試得王鏊爲第一試錄五策皆刻鏊場屋中墨卷不易一字一時稱得人明年鏊果會元及第

雲南增解額五名著爲令

十一年乙未二月命少詹事徐溥侍讀學士彭華爲會試考官華以從子入場疏辭遂改命侍講學士丘濬取中王鏊等三百人

時士子有慕道學者或過爲詭異之行以徼名濟因發

策言之俾士習趨於正故廖道南謂明興舉業爾雅自丘文莊知貢舉始云

三月 上御奉天殿親策士親閱所對策賜謝遷劉戡王鏊等進士及第出身有差

鄉試小錄前舊有吏典掌行科舉及生員謄錄對讀二條十二年以少詹事黎淳言始削去之淳又言士子有文理差錯行文有疵表失平仄字畫差錯者皆宜究治禮部覆議平仄不順字畫差錯與文理差繆者不同宜仍令會試從之

十二月黎淳奏科場出題作文定式謂洪武年間已嘗頒降近年所刊程文純粹者少駁雜者多乞移文所司將考試官究治申明科場舊制頒降學榜永爲遵守 上曰科舉重事各處出題刊文等事何爲違式差謬該部會同翰林院學士等官覆奏考試等官務取學行老成之士不許徇私濫舉出題校文并刊錄文字必須合式依經按傳文理純正不許監臨等官干預

十四年戊戌命禮部尚書翰林院學士劉吉翰林院學士彭華爲考試官取中梁儲等三百五十人

廷試賜會彥楊守陟曾追及第或云閣老萬安得彥策擊節歎賞又先一日唱名過視之美而頎長也擢第一及

陛傳彥老而多髭且短萬意惘然退再取策閱之平平耳大驚嘆以爲神助 是科譚溥以山東驛丞中式

是年以大學士萬安劉珝劉吉吏書尹旻兵書余子俊刑書林聰工書王復兵書兼左都王越掌通政司事工書張文質大理寺卿宋旻克殿試讀卷官

按讀卷官國初用祭酒修撰等官洪武初年國子祭酒魏觀太常博士孫吳與給事中李顏修撰王俱四人克讀卷正統中猶與其事其後非執政大臣不得與而去取之柄則在內閣國初於殿試之明日卽傳臚揭榜今制約以三日內閱卷禮部地專而人衆庶得盡心鑒別

云 凡殿試讀卷官內閣於大學士學士等官內具名

送該部奏請至日與各衙門該讀卷官詳定試卷次日

同赴文華殿內閣官將第一甲三卷以次進讀俟 御

筆批定出將二甲三甲姓名填寫黃榜又次日蚤回

華蓋殿內閣官進至御座前以次拆卷將姓名籍貫面

奏司禮監官授制勅房官填榜畢開寫傳臚帖子內閣

官一員捧榜出至奉天殿授禮部尚書制勅房官將帖

子授鴻臚寺官傳臚其受卷彌封掌卷官從內閣於翰

林院及春坊等官并制勅房官內推選與各衙門官相

兼執事翰林院坊局始不過五人後增至七人遂爲例

十五年十二月御史許進言國家以科目取士慎選考官
近各布政司每遇開科輒徇私情所聘考官多非其人
以致校閱不精兩京俱命翰林官主考故所取得人乞
各布政司亦如兩京例命翰林官主考爲是 上諭禮
部臣曰科目選賢國家重事若聘主司有徇私作弊者
令巡按御史并布按二司互相糾舉或爾部中詳看體
訪得出奏來必重治之

十七年辛丑正月禮部言會試天下舉人合用同考試官
今詩易卷多乞每經各增一員 上曰科舉取士務在
得人增同考試官庶得詳於校閱從之

二月命太常寺卿兼學士徐溥少詹事王獻爲主試官取
中趙寬等三百人 是年李旦以榆林衛軍中式

三月 上親策士賜王華黃珣張天瑞等進士及第有差
二十年甲辰命詹事彭華庶子劉健爲主試官取中儲懽
等三百人 是科張綸以富峪衛總旗王璠以岷州衛
吏中式

三月廷試賜李旻白鉞王敕等進士及第有差

二十二年禮部尚書周洪謨等奏本年天下鄉試錄文多
乖謬乞將考試官訓導黃奎追奪聘禮行巡按御史提
問從之

十一月更定會試取士南北中卷額數舊例會試舉人以
百名爲率南數取五十五名北數取三十五名中數取
十名是年內閣萬安禮部尚書周洪謨俱四川人四川
左布政潘稹卽希二人意言額數不均於是南北各退
二名中卷多增二名

令舉人授教官六年有功蹟者許會試

二十三年丁未命兵部尚書兼學士尹直諭德吳寬爲主
試官取中程楷等三百五十人

三月 上御奉天殿策士賜費宏劉春涂瑞等進士及第
有差

弘治三年庚戌命大學士徐溥少詹事汪諧爲考試官取
中錢福等三百人

三月廷試賜錢福劉存業靳貴等進士及第有差福試策
三千餘言不屬草辭理精確若宿構然內閣劉健得之
贊不容口請於 上賜第一尋以不檢敗

舊制殿試畢次日讀卷又次日放榜是年大學士劉吉等
言時日迫促閱卷未精請再展一日至第四日放榜至
今爲例

四年令醫士在冊食糧執役者許在京應試

九月大學士劉吉奏定舉人三次不中者不許會試以劉

國朝典彙卷二百三十一
編花之嘲出自監中一老舉人也吉去舉人會試禁限亦除

五年四月巡撫雲南都御史張泰請開解額下部議增五名

六年癸丑二月會試舉人命太常少卿兼侍講學士李東陽少詹事陸簡爲考試官取汪俊等三百人

三月廷試賜毛澄徐穆羅欽順等進士及第出身有差

八年言官請雲南貴州鄉試進呈錄稱雲貴鄉試錄共增解額五名上從之

九年丙辰二月命詹事謝遷侍讀學士王鏊主會試取陳瀾等三百人鏊取士專尚經術險麗奇袤者一切屏去弘治間文體一變士習稍端鏊有力焉

三月廷試賜朱希周王瓚陳瀾等進士及第有差

十二年己未二月命大學士李東陽掌詹事府禮部侍郎程敏政主會試三場甫畢給事中華昶疏劾程敏政素因不謹已放歸田營求李廣復官禁近叨爲考官甘心市井將論語表題策三問四問題賄賣與江陰徐經蘇州唐寅二生狂童孺子先以題問人且驕於衆已而果然敗露至此百口難掩臣思景泰年間徐泰買中順天解元事露覆試學士高穀曲護倖免今徐經與泰同家

敏政又從而招徠之遂與唐寅等相率以賂其門朝廷取士之科關繫最大豈容再壞疏入下梟獄候問禮部尚書徐瓊等覆議奏敏政迴避其私賣三場題目傳誦於外恐或未真况未開榜其所買之人曾否取中難以定奪合令李東陽會五經同考官將場中硃卷凡經敏政看者重加校閱果有情弊出場之後通行究治

是月二十九日揭曉取倫文敘等三百人凡敏政所取者李東陽等俱封收備照不錄工科給事中林廷玉復疏程敏政事謂臣嘗爲同考試官與知簾內事且職在諫垣不可循默但據簾內所見敏政閱卷可疑六事上之於是逮廷玉敏政并下獄會多官廷鞫事聞黜舉子唐寅徐經等十餘人爲民令敏政致仕調臬南京太僕寺典簿廷玉海州判官

先是敏政問策以劉靜修退齋記爲題人罕知者其所昵門生徐經居平日窺得之爲其同年解元唐寅說由是各舉答無遺寅疎人也因自矜且得上第爲臬及廷玉所論併敏政下獄按問經自誣服購敏政家人得之又寅曾以金幣乞敏政文送洗馬梁儲一云果敏政家人爲之也

三月廷試賜倫文敘豐熙劉龍等進士及第有差

十四年七月掌國子監禮部右侍郎謝鐸言四事二曰重
科貢以清入仕之路謂各省考官皆御史方面之所辟
召職分既卑權衡無預以外簾之官而專去取關節相
通人圖倖進必差京朝官二員以爲主考庶幾革弊而
真才可得疏入下所司知之

按國初考試官雖儒士亦在所聘惟其人而已後專任
教職乃有遺珠之嘆至是以從禮臣言以京朝官爲主
考而不拘見任致仕故少卿楊廉以服闋主浙江主事
王守仁以病痊主山東試已而言官劾楊爲不孝王爲
不忠法遂廢至嘉靖戊子復行之僅兩試而止迨萬曆
乙酉復行之至今不變云

十五年壬戌二月命吏部左侍郎吳寬侍讀學士劉機主
會試取魯鐸等三百人

三月廷試賜康海孫清李廷相等進士及第有差

十八年乙丑命太常寺卿兼學士張元禎左春坊大學士
楊廷和爲考試官取中董玘等三百人

廷試賜顧鼎臣董玘謝丕及第初閣臣擬魏杪第一因策
中有陛下一日之間在坤寧宮之時多在乾清宮之時
少等語不可宣讀抑置二甲第九而顧遂得首擢相傳
上於內殿焚香籲天願得真才以佐治理故是科舉士

至貴近臣毋慮數十百人而名臣亦不乏云

是科會試一名與二名湛若水三名崔銑四名謝丕五名安盤俱入翰林亦一奇也

正德三年戊辰命大學士王鏊吏部尚書梁儲爲考試官取中邵銳等三百五十人

廷試賜呂柟景暘戴大賓及第時焦芳子黃中二甲第一劉宇子仁第四皆逆瑾黨也因刻黃中及三甲第一人

胡纘宗策俱授翰林院檢討改仁及邵銳黃芳爲庶吉士諭月超擢黃中仁及邵銳黃芳爲編修黃中再進侍講而焦芳爲題名記盛稱所改之制爲當後瑾誅黃中

仁爲民銳芳纘宗俱坐貶或傳會試鎖院後劉瑾以片紙書五十人姓名欲登第主司不敢拒唯唯而已瑾曰先生輩恐奪賢者路耶卽開科額三百五十人皆上第

五年八月禮部左侍郎費宏奏山東河南陝西山西解額係劉瑾增者今科姑聽俟後科復舊從之

六年辛未二月命大學士劉忠詹事靳貴主會試取鄒守益等三百五十人

三月廷試賜楊慎余本鄒守益等進士及第出身有差慎輔臣楊廷和子也慎博洽有才名京師人猶稱爲面皮狀元

國朝典彙卷二百二十八 / 刑部
按餘冬序錄宋太宗朝呂蒙正李昉爲相蒙正之弟蒙
亨舉禮部高第旣廷試與昉子宗諤竝以父兄在中書
罷之仁宗朝韓億爲叅知政事子維舉禮部不與廷試
受廕入官宋制嚴於宰相子弟如此惟秦檜柄國而子
燾孫埴南省廷試皆冠多士我朝景泰間大學士陳循
王文子鄉試不第許訟考官特賜舉人弘治乙丑科謝
遷子丕至是廷和子慎其父引嫌不預讀卷其子竝得
及第前此戊辰焦芳以子黃中不得狀元及第降調翰
林諸執事官故是科不得不爾於此見我朝法制視宋
刑不逮宋人遠矣

大學士劉忠先是有疾累疏乞歸未允強出爲會試主考
官揭曉後卽乞省墓時費宏爲禮部尚書知貢舉將會
錄所刻文字指摘其疵謬以白紙票粘於文字之旁托
中官入奏 上召李東陽等至煖閣命太監張永以所
進會錄授之曰今欲別有施行恐壞衙門體面但與卿
輩知之耳東陽捧錄叩頭出是日忠適以省墓陞辭聞
之抱快而去抵家遂具疏乞休 上已有先入之說遂
許之

八年甲戌二月命大學士梁儲翰林學士毛澄主會試取
霍韜等四百人費宏以儲位在已上仍將會試錄旁注

貼說指摘以進 上察知之置不問

是科有二魯鐸二朱袞魯一楚人一永平人朱一貌美
一不揚故時有對云魯鐸分南北朱袞別妍媸

三月廷試賜唐臯黃初蔡昂及第初貴溪人也朱寧惡大
學士費宏譖於 上論其私鄉人罷官

十二年丁丑二月命大學士靳貴少詹顧清主會試取倫
以訓等三百五十人 倫與二名汪應軫三名葉式四
名江暉五名王廷俱入翰林

三月廷試賜舒芬倫以訓崔桐等進士及第出身有差

夏四月大學士靳貴罷先是辛未春貴主考會試言事者
詆其家人受賄鬻題事至是年春貴方以病在告既而
稱愈復出典會試益致羣疑於是言官復醜詆之貴遂
致上

十四年己卯江西以宸濠之亂遂廢鄉試濠平給事中王
紀請次年舉行不報至嘉靖元年巡按御史唐龍請依
額倍取禮部覆議從之

十五年庚辰 上在南京命吏部左侍郎石珪侍讀學士
李廷相爲會試考官取張治等三百五十人以 上南
巡未廷試

十六年辛巳夏五月 世宗登極始殿試庚辰中式舉人

禮部奏 武宗喪禮事宜從簡 上御西角門策問賜
楊維聰陸欽費懋中等進士及第出身有差狀元率諸
進士於西角門上表謝恩

按洪武辛亥有進士永樂癸未無進士天順癸未亦然
永樂初卽位天順南省火皆以明年甲申會試永樂己
丑 成祖北征又明年殿試故有辛卯進士正德庚辰
武宗南巡明年 世宗卽位故有辛巳進士我朝至正
德止百六十年癸未惟一舉

嘉靖元年左諭德溫仁和侍講穆孔暉主順天鄉試仁和
頗有議南道御史王木劾其私通關節大得包苴不報
御史向信言各省鄉試聘取考官監臨提調諸臣私所
善濫及匪人謬亂滋弊今 陛下龍飛首科宜飭諸司
力除宿弊考官年過四十及不係近科舉人不得濫舉
違者罪之下禮部議報可

二年癸未命大學士蔣冕吏部尚書石琚主會試取李舜
臣等四百名

三月廷試賜姚涑王教徐階等進士及第出身有差

五年丙戌二月命大學士賈詠詹事董玘主會試取趙時
春等三百人

三月廷試賜龔用卿楊維嶽歐陽衢等進士及第出身有

國朝典彙卷之百二十八 禮部
四十六
差是日賜宴禮部會武定侯郭勛侍勛因奏歷年賜宴
主席大臣位次居中今宴圖乃左右列坐臣無足齒柰
辱朝命何得旨如舊規行比入宴禮部設席仍左右分
列勛不得已就左席已復疏爭之 上責禮部不奉詔
令自後務遵故事毋再爭擾

禮部尚書席書言舊例廷試貢士掌卷官先行看閱分
送內閣然後以次及於九卿進士甲第前後第決於讀
卷官職之尊卑不復論其文之高下非所以示大公也
自今謂宜糊名混送以防奸弊其一甲三名不分內閣
九卿從公會取既定然後輪次均填不宜偏私以官爵
爲序疏入 上初未允書復爭論乃許之

先是廷試納卷之日彌封官以首列數名送內閣備首
選內閣密覘容貌及平日有名者閱卷出東閣歸宿私
第至是乃詔彌封官不得呈卷於讀卷官而閱卷者不
得宿私第

六年兵部左侍郎兼學士張璫條陳慎科目三事一正文
體請令主司校文務取平實爾雅有裨實用仍於周禮
儀禮中出策一道使之習於禮學然後責以事君使民
一明實錄言鄉會試錄宜取生儒原卷稍增損一二字
不必盡出已筆分考校之功一慎考官請各省鄉試宜

如兩京事例擇翰林院科部官爲之主考毋令權歸外
簾得以預結生徒暗通關節 上深善其言令所司如
議舉行各省鄉試主考令禮部舉京官或進士每省二
人馳往供事監臨官不得參預兩京鄉試主考外五經
房仍各加科部官一員

九月右庶子韓邦奇方鵬主順天府鄉試疏中引用經文
有曰元首喜哉股肱起哉又曰帝光天之下萬邦黎獻
共惟帝臣錯亂二語截除數字又聖學先朝龍飛字樣
俱不擡頭錄中訛字復多提學御史周易劾奏之而疏
中亦誤以於爲海於光輝爲光暉部覆得旨科舉重事

京闈又文教所先乃錯謬至此何以垂示四方韓邦奇
主典文衡麤率不謹擡頭違式擅更經文字義差訛詞
語重複周易欲舉他人之差謬而已亦差謬俱降一級
改南京用方鵬旣同職掌失於查對御史丘道隆等監
試不蚤糾舉各停俸二月示罰同考署員外郎鄧尚義
等不係專責姑宥之試錄仍命順天府校閱改正邦奇
降南太僕丞易降南右衛經歷

八年己丑命大學士張孚敬學士霍韜爲考試官取中唐
順之等三百三十人 是科初變文格以簡勁爲主其
程式文僅三百字云

廷試上親策賜羅洪先程文德楊名及第先是大學士
楊一清等以洪先文德名及唐順之陳東任瀚六卷進
覽上一一品題卷首各御批於洪先曰學正有見言
讜而意必忠宜擢之首者於文德曰探本之論於名曰
能守聖學以爲此知要之說於順之曰修論精詳殆盡
於東曰仁智之用著之吾心此不易之說於瀚曰勉吾
敬一之爲主忠哉六策以有御批刻錄中是歲大學士
楊一清等考庶吉士以唐順之任瀚陳東三名爲上
御批取首列居數日有旨邇年以來每爲大臣徇私
選取市恩立黨唐順之等一體除用有才行卓異學問
優正者吏部舉奏收之翰林以備擢用

六月大學士楊一清言舊例進士開科禮部奏請於國子
監立石題名儒臣撰記一朝盛典傳之永久正德六年
以來國家多事因循不作皇上敦化崇文始命輔臣
追記補之嘉靖五年丙戌科題名記僉謂臣職當撰述
臣竊謂此記雖禮部題請命翰林院撰文然未嘗奉旨
專命何官而各年碑石竝書臣奉勅撰其文又未嘗
呈覽揆之事體似有未安竊聞先朝大學士楊榮李賢
等連科撰述皆出宸衷况我皇上聖文溢發凡近
日冊詔誥勅有所指點皆非臣等所及臣謹以撰稿錄

進伏乞少運 睿思改發工部仍行翰林院撰定制勅
房官一員書寫勒石以後俱可照此行 上從其言遂
著爲令

十年四月給事中謝存儒奏言登進士人宜做周世辨材
論官之法布衣羅崇槩乞命督學憲臣廉察德行以爲
黜陟禮部覆議從之

禮部奏禁士子冒隱年歲 上曰是弊不獨士子爲然有
外官亦多有之各令首舉改若隱匿不聞臺諫官及巡
撫御史廉實奏斥

巡按浙江御史李信言各省鄉試官宜 同監臨等官揭
書出題考試官取應試卷先期將號數發出聽監臨官
叅之墨卷以定去處禮部復議考試監臨分掌先大學
士張孚敬題各省外廉官預結生徒密通關節不公之
弊莫甚於斯今復令外廉官叅之墨卷不惟非 祖宗

糊名易書之法亦非今日補偏救弊之意宜照先奏欽
依事例未出榜以前監臨官不許干與以撓職守出榜
之後內簾果有不公等弊據實糾舉 上曰各處鄉試
事宜俱照題 准事例行

十一年壬辰二月命少詹事張潮侍讀學士郭維藩爲會
試考官取林春等三百十六人先是禮部尚書夏言當

知貢舉條上三事曰變文體以正士習責主師以定程式簡考官以重文衡 上曰文運有關國運所係不細近來士子經義詭異艱深大壞文體誠爲害治宜明禁諭務醇正典雅明白通暢如仍前鈎棘奇僻痛加黜落甚則主考具奏處治

三月 上親策試舉人賜林大欽孔天胤高節等及第有差 先是禮部尚書夏言上疏請正文體諸刻意騁詞浮誕決裂壞文體者擯不得取 詔可既廷試言復令儀制郎中約束諸士咸拱聽而大欽獨後至不聞也起不用對冒而文氣甚奇吏部尚書汪鋐得之詫曰惟哉以示大學士張孚敬已定二卷覽之曰雖破格甚明健可誦也取爲第三既呈覽 上御批第一大欽時年二十有二第二名孔天胤以王親例補外爲湖廣提學僉事先是 上御殿傳臚諸進士皆集闕門一序班謬傳令儒服首名林大欽及諸進士巾袍者百餘人次名孔天胤以便服掖門外 詔問狀鴻臚卿王道中以爲禮部失於曉諭 上切責部臣奪司官俸一月禮部言已嘗先期揭示實以序班妄傳遂致錯誤道中對狀切責而宥之序班孫士約等下法司逮問大欽天胤等俱免究

十二年十月 詔罷京官主考省試禮部尚書夏言疏言
各省開科名爲鄉試原係有司職務實古人鄉舉里選
之遺意近以京官主試亦一時補偏救弊之法可偶一
行之若踵爲常規又不無弊况考官與按臣每爭較禮
節競生嫌隙一切事宜多有未便請罷之 上從其請
令仍用敎職

十三年命侍講學士廖道南侍讀張袞主順天試諭德倫
以訓贊善張治主應天試取歐陽暎鄭維誠各百三十
五人道南以初場進題遲下禮部叅請辭鹿鳴宴不許
時吏部尚書汪鉉子不第上疏指摘道南

太祖

誅劉三吾例道南引劉儼事答俱不問時應天進呈試
錄失裁山西進呈試錄誤夾片紙 上皆謂其不敬下

應天府於南京法司山西布政司官巡按御史各逮問
十四年乙未始令雲南貴州各另開科取士先是貴州鄉
試附於雲南道里不便給事中田秋建議欲於該省開
科下巡按御史王杏勣議稱便因請二省解額命雲南
四十名貴州二十五名各自設科

命侍讀張璧侍講蔡昂爲會試考官取許穀等三百三十
人

廷試賜韓應龍孫陞吳山等三百二十五人及第出身有

差次日宴於禮部殿試日 上親賜策問及讀卷畢李
時以十二卷進降諭曰卿等所進卷朕各覽一週其上
一卷正合題意夫周道善而備朕所取法其上三說仁
禮爲用夫仁基之禮成之亦甚得題意其上四論仁敬
夫敬而能仁他不足說可以保治矣其上二略泛而滯
於行其下二却似儻雖與題不合然言及時事故朕取
之可二甲首餘以次列去不知是否卿可先與鼎臣看
一過再同讀卷官看行 上復御批首三卷曰是題本
意可一甲一名說仁禮之意好可第二名敬爲心學之
要此論好可一甲三名是歲并李璣趙貞吉郭朴敖純
任瀛沈宏駱文盛尹臺康太和九人策皆刻蓋自有制
科以來朝廷策士未有親承 聖問躬自披閱如是舉
者後禮部因請以 聖諭恭列登科錄篇首其十二人
策對俱以次刊刻從之

十六年八月命侍講學士姚涑中允孫承恩主順天試諭
德江汝璧洗馬歐陽衢主應天試取鄭光溥王諷等各
百三十五人南考官批語失列名下部叅看謂不敬當
提問又策題以周禮祀戎爲問語多譏訕試官汝璧衢
錦衣衛建訊提調府尹孫懋丞楊麒監場御史何鉉沈
應揚南京法司究問房考學正許文魁等所在巡按建

問所取士不准會試後復許之降璧提舉衢通判
禮部尚書嚴嵩又指廣東錄聖謨帝懿四郊上帝俱不
擡頭陳白沙倫迂崗非君前臣名義且飛衛紀昌道遇
交射黃郊紫薇碧虛子問答惟異 詔學正王本才等
布政陸杰等按察司蔣淦等俱巡按官逮問本才等仍
奪禮幣御史余光法司逮訊仍通行天下提學官禁士
習恠誕違式者悉黜之

十七年戊戌二月禮臣言邇來文體日壞道術日微宜勅
會試取士務取淳正典雅合於式者其鈎棘苗軋者黜
若背經旨引用莊列不經之語者叅奏

命大學士顧鼎臣吏部左侍郎張邦奇爲考官取袁煒等
三百二十人

三月廷試賜茅瓚羅珏袁煒等進士及第出身有差

時內閣初擬陸師道爲狀元 御筆批作二甲第五改
袁煒第一文華殿宣讀已出復 召大學士李時夏言
學士顧鼎臣入改煒第三擢茅瓚第一

十九年詔增湖廣解額先是湖廣鄉試額八十五名巡按
御史姚虞奏請增額以崇表 帝鄉作典士類禮部覆
請 上曰湖廣朕 皇考德化所及之地解額准增九
十名

二十年辛丑二月會試命掌詹事禮部尚書溫仁和侍讀
學士張袞爲考試官取林樹聲等三百人

三月廷試賜沈坤潘晟林一鳳等進士及第出身有差
二十二年禮部言人才之生其地者多寡不同故解額因
之而異至於會試則分爲南北中卷取之各有定數所
司不得增損奈何法久禁疎遂有遊學矯詐之徒見他
方解額稍多中式頗易往往假爲流移冒籍入試至有
脫逃罪犯變易姓名奔徙營求靡所不至會試舉人報
籍印卷亦有假託族屬改附籍貫朦朧開具以南作北
國法罔存士風大壞乞於明年會試嚴加覈究但係先
年冒籍曾經恩赦者許其歸正其他籍貫不明妄報中
卷北卷者本部指名叅退仍行兩京各省凡遇鄉試開
科提學考選生儒不得將流移附籍之徒一槩濫收以
玷科目違者奏請治罪報可

中書舍人陸燁乞應順天鄉試許之中書實授者法不得
試燁錦衣衛都事炳之弟也

逮繫巡按山東御史葉經詣京朴死於闕廷初經劾嵩受
表相惟熈賄事嵩啣之及經監山東鄉試進呈試錄中
有諷上語 上覽試錄手批其第五問防邊禦虜策曰
此策內含譏訕禮部其叅看以聞於是尚書張璧等言

今歲虜未南侵皆 皇上廟謨詳盡天威所懾乃不歸
功 君上而以醜虜饜飽爲詞誠爲可惡考試官教授
周鑛李弘教諭劉漢陶悅胡希顏程南吳紹曾葉震亨
胡僑率意爲文叛經訕 上法當重治監臨御史葉經
漫無糾正責亦難辭其提調布政使陳儒叅政張臬監
試副使談愷潘恩均有贊襄之職俱屬有罪 上曰各
省鄉試出題刻文悉聽之巡按考試教官莫敢可否此
錄不但策對合譏卽首篇論語義繼體之君不道葉經
職司監臨事皆專任并同鑛等陳儒等俱令逮繫至京
治之尋逮經儒臬愷恩至 上以經狂悖不道命廷杖
八十爲民乃降儒等邊方雜職經遂死於杖下及補儒
等爲宜君等縣典史

初順天鄉試歲多冒籍中者慈谿人張汝濂易名張和冒
良鄉籍禮科給事中陳棐劾奏之因歷陳京闈之弊謂
國家求賢以科目爲重而近年以來情僞日滋其中奸
宄之徒或居家之時作奸犯科削籍爲民兼之負累亾
命變易姓名不敢還鄉者有之或因本地生儒衆多解
額有限見他方人數頗少逃奔入京投結鄉里交通勢
要鑽求詭遇者有之或以順天鄉試多四方之人人不
相識可以買托代替者有之一遇開科之歲奔走都城

尋覓同姓假稱宗族賄屬鄉官拴同保結不得府學則
謀武學不得京師則走附近不得生員則求儒士百孔
營求冀遂捷徑及其中科回籍則既告路費又告牌坊
四顧罔利真同登壠而其未得者則從旁挾持互相攻
發蜂起浮議呈帖匿名 聖明輦轂之下豈宜有此不
美之事請令所司覈究順天府學冒籍生員俱遣回籍
降等肄業京衛武學非武職應襲不得濫入歲貢援例
監生如舉人教官會試例止得一入京闈後但本省應
試而京闈鄉試如各省法唱名辨驗不得混冒庶乎前
弊可革得 旨 張和下法司逮治冒籍生員提

學御史覆勘餘俱下禮部會議給事中李念疏論工部
侍郎陸杰從子光祚太僕寺卿毛渠子延魁鴻臚寺卿
陳璋子策冒京衛順天二學中式劾杰等欺罔不忠提
學御史謝九儀以被訐冒京衛順天二學中式鄭夢綱
等十人論奏俱下禮部行所司覈其真偽至是議上謂
孫鎡孫鑰王宸陸宏四人係錦衣衛太醫院見任官親
子侄當存留會試鄭夢綱陶大壯沈譜丁子載陸可成
翟鍾玉六人俱詐冒籍貫當發回原籍入學肄業仍得
應其鄉試陸光祚陳策毛延魁雖稱隨任終屬冒籍亦
當一體發回得 旨孫鎡等鄭夢綱等俱依擬陸光祚

國朝典彙卷二百三十八
等始准存留不許對制陸杰陳璋毛渠俱貸之明年言
官復摘左贊善浦應麒賣題事下獄杖之六十并舉人
翟鍾玉等俱爲民又以取中翟汝孝汝儉并左中允秦
鳴夏俱逮捕奪職

詔褫貴州鄉試監臨御史魏洪冕職爲民提調布政使侯
緘叅議翁學淵監試副使王積僉事施昱各降三級考
試官教授楊伯元教諭穆旺謝德聰歐陽深黃持衡各
降雜職是歲貴州所進鄉試小錄體式多違誤其書經
義及論詞復乖盭不經禮部叅請薄罰 上謂其差謬
旣多且意涉譏諷特重譴之已乃降緘雲南副使學淵
真定府通判積兩浙運副昱茶陵州同知伯元等俱降
淮浙課鹽司大使等官

南京御史包孝奏辛丑會試禮部尚書溫仁和主試編修
嵇世臣爲禮經分考賄中進士徐履祥陳志潘仲驂當
追罷且言庶子童承敘之嗜酒贊善郭希顏之輕險編
修袁煒之放蕩俱不堪典試事宜量行別用時仲驂等
授官仁和承敘已故吏部覆希顏煒等俱令痛加策勵
上責部臣不行分別查究漫無可否希顏煒事無指實
照舊供職世臣等事屬曖昧置不問

二十三年甲辰二月命禮部尚書張潮左庶子江汝璧爲

會試考官時潮入貢院三場畢以病死輿屍出考試唯江一人而後序則屬同考修撰茅瓚爲之取中瞿景淳等三百二十人

三月 上親策試士賜秦鳴雷瞿景淳吳情及第而以傳翟鑾二子汝儉汝孝俱與焉少傳以嫌故辭讀卷不許既試以進呈卷上 上疑汝儉等在首甲因抑第一卷寘第三復抑第三卷寘二甲第四拆卷果汝孝也 上又夢聞雷遂拔鳴雷爲狀元

鳴雷以赴宴後期爲禮官所劾 詔宥之又傳讀卷官已定吳情第一因北音無字讀吳 上曰無情豈宜居

第一遂置第三而因殿燔結雷字乃拔鳴雷云

八月刑科給事中王交王堯日論劾少詹事江汝璧修撰沈坤編修彭鳳歐陽喚員外高節朋私通賄大壞制科大學士翟鑾以內閣首臣二子汝儉汝孝既聯中鄉試又連中會試若持券取物然崔奇勳乃汝儉等師焦清與汝儉結媼又同受業四人者會試俱一號汝儉汝孝奇勳皆彭鳳所取詩經考官五人何俱在鳳一房歐陽喚亦汝儉等師本同經又改看書經跡若引嫌而陰助鳳尋卷及沈坤之取中陸燁高節之取中彭謙汪一中皆以納賄故乞明正其辜且欲追順天鄉試主考秦鳴

夏浦應麒阿奉翟鑾之罪 上下其章吏部都察院從公參看鑾隨具疏自理且請特降題目命部院大臣覆試 上怒曰鑾被劾有旨參看乃不候處分肆行擾辯屢屢以直無逸爲辭同夏言禁苑坐轎止罪一人全不感懼敢以撰科文贊玄修爲欺朕內閣任重不蚤赴以朕不蚤朝竝君行事二子縱有軼轍之才豈可分明竝用恣肆放僻如此部院其參閱治罪不許回護部院覆請下汝璧於理嚴究分別情罪重輕 上以跡弊明顯大壞 祖宗取士之制遂勒鑾并汝儉汝孝奇勲清及鳳喚俱爲民汝璧等俱下鎮撫司逮問已法司會鞫謂汝璧鳴夏應麒雖各阿取輔臣之子然實非賄故坤之取煒節之取一中亦然獨彭謙實以杪尉張岳賄節五百金而中御史王珩沈越失於糾察罪亦難逃疏上詔杖汝璧鳴夏應麒六十革職閑住不敘珩越降一級調外任節岳充軍謙爲民坤一中煒存畱供職先是江汝璧奏辯言臣爲考官時在內有給事中盧勲周案陳棐爲同考試官在外有御史王珩沈越爲監試官此五臣皆 陛下除奸革弊之人臣若有此情當時豈得不言 上曰盧勲等職係言官目見場中情弊如何不行糾奏因令勲等對狀勲案棐乞恩認罪命降俸三級以

國朝典彙卷三十一
科
珩越強辯命逮繫錦衣衛謫珩判滁州越判開州時擬
降調出刑部尚書聞淵都御史熊浹以爲太過淵因連
揖謝之蓋淵有所爲希執政意也

二十五年禮部覆南京給事中萬虞愷等條款科場事宜
請會試及兩京主考翰林官內盡數開列及部科官亦
多擬上候點其各省鄉試請聘教職不足則聘外省推
官知縣等官入內簾主事外簾不得有所干與印卷封
號須加詳慎入場始唱名給卷納卷卽登時彌封使奸
人不得措手以杜關節得旨會試及兩京考官着遵
舊制餘如議行

七月增貴州解額初貴州原附雲南額取二十一名嘉靖
十四年始於本省開科定額二十五名至是撫按官王
學益蕭端蒙等奏本省人才加盛又附湖廣鎮遠等伍
衛軍生乞量廣解額詔增至三十名遂爲例

二十六年丁未禮部尚書費寀知貢舉當入場進題以從
子懋文應試請以右侍郎崔桐入場領題先於朝房宿
歇至期同捧入朝詔從之

二月命吏部左侍郎孫承恩張治爲會試主考官取胡正
蒙等三百人

三月廷試賜進士李春芳張春胡正蒙等及第出身有差

二十八年應天鄉試禮部尚書徐階子璠倩人入場事覺南京給事中萬文宗及監察御史楊順張鑑論階縱子犯法請罷階因疏求去 上以階日直左右其子犯法遠不得知 詔令安心供職

二十九年庚戌二月命禮部尚書張治吏部侍郎歐陽德主會試取傅夏器等三百二十人

三月 上親策試士賜唐汝楫呂調陽姜金和等進士及第有差

三十一年給事中黃元白言京闈鄉試伊邇宜慎選考官如洗馬黃廷用素行不謹恐序當及之有玷文衡 詔以廷用調南京別用遂改南京兵部員外郎

八月江西鄉試貢院火巡按御史蕭端蒙因論執事諸臣罪 詔下金谿知縣劉灼等六人於御史訊問奪右叅政馬森按察使陳洙副使譚大初俸一月

三十二年癸丑二月命大學士徐階侍講學士敖銑主會試取曹大章等四百人

三月 上親策試士賜陳謹曹大章溫應祿等進士及第有差

三十四年十月先是貴州開科附以湖廣五衛無何又以四川永寧撫司學附焉未嘗限其名數由是四方遊食

通罪生儒皆冒五衛永寧籍求試貴州生儒亦既憎之
其後雲南廣西學桵近貴州境者且復求附科至是御
史孫哀請行禁止部覆報允令貴州鄉試不得復請附
科五衛永寧中式勿得過三人

三十五年丙辰二月命大學士李本少詹事尹臺主會試
取金達等三百人

三月 上親策試士賜諸大綬陶大臨金達等進士及第
有差

四月戶部郎中金九齡以廷試時私入禁門爲衛士所執
下法司訊治黜爲民

三十八年己未二月命吏部右侍郎李璣太常少卿兼學
士嚴訥主會試取蔡茂春等三百二十人

三月 上親策試士賜丁士美毛惇元林士章等進士及
第出身有差

是科中吳紹吏部尚書鵬之子吳緝之異母弟也戊午
藉鵬壻董份主順天鄉試得與計偕因連第緝忌之而
姻聯嚴世蕃御史耿定向知緝意遂告嵩云欲劾之嵩
曰此美名可市也而又告徐階階曰如嚴不懌何曰嚴
已許我矣乃具疏號於衆鵬懼請於嵩嵩又戒以勿言
遂寢

國朝典彙卷二百三十八 科舉
四十年八月 命諭德吳情侍讀胡杰主應天試取許國等百三十五人

禮科給事中丘岳等奏應天錄文既已傳布而考試官吳情屢行更易胡杰不行救正乞分別究治得 旨俱調外任情遂調廣東市舶提舉杰廣平府通判吳情無錫人其邑之預薦者凡十三人以是籍籍而胡之家僅有泄題而遁者未必皆有徇也其後胡旋起亦竟不利而吳以老不赴官自是南畿之在翰林者不得入南試以爲例

四十一年壬戌二月命大學士袁煒吏部左侍郎董份爲考試官取中王錫爵等三百人

廷試賜徐時行王錫爵余有丁及第是歲煒承恩特賜白金文綺御膳於棘院份亦與焉蓋異數也少保兵部尚書楊博左都御史潘恩以子中式辭讀卷不許工部尚書雷禮以督工辭讀卷許之仍敕列名於錄又特用吏部左侍郎李春芳不爲例

四十三年禮部覆南道御史官所陳兩京鄉試革弊事宜今後兩京主考不用本省人如資序挨及南人用北北人用南以別嫌疑又同考用京官進士出身者易詩書各二員春秋禮記各一員其餘叅用教官以便覽察又

國朝典彙卷三十八 科目
膳錄用書手對讀用生員以防洗改但此三事專爲兩京鄉試而設其各省及會試亦當因其說而廣之因更上六事一會試及兩京鄉試監試官預於二十日前選差以便防範一巡視搜檢務加嚴慎以杜奸弊一各省務精選才望內簾官無令外簾干預應舉生儒二十五名中一名中式之文務崇簡易凡浮繁冗雜詭僻不經悉行黜汰仍叅取後場以采實學一解原卷到部以憑稽查得 旨各鄉試俱照舊規令監臨公同考官揭書出題提調監試等官不得干預餘皆如議行

遣御史陳聯芳凌儒監順天鄉試 上以科場事宜邇年

弊多諭儒等悉心綜理嚴加禁革先是兩京監試御史皆臨期方遣禮部以爲倉卒之際不便防奸故是歲遣官蚤云

命諭德汪鏜中允孫世芳主應天試世芳以病卒於貢院輿屍而出同考官吏部主事蔡國珍代爲後序是歲

詔自今兩京鄉試同考官仍擇文行俱優年力精壯教職克之罷部臣勿遣時給事中辛自修鄧楚望御史羅元佑交章摘發科場奸弊冒籍生員章禮等五人關節監生項元深等三人元深乃禮部主事戚元佐所薦同里人也於是自修等併劾元佐曹棟復言戶部尚書高

國朝典彙卷二百三十八 刑部
燿薦屬官陳洙爲考官托其子高堂遂得中式而外簾
爲之關節者卽宛平縣丞高燦燿之親弟也踪跡顯然
人所共知俱請論如法以振頽綱疏下禮部查議獨黜
冒籍陳道箴呂祖望回籍克附禮等各行原籍勘實堂
元深等以覆試文可俱准中式燿元佐洙俱不坐燦以
始不引嫌調外任於是罷部僚與試而行提學御史徐
燦通查在京冒籍生員斥遣有差復 詔增拓舉場前
地臨入試時增遣監場御史二員先於場門外檢閱以
進著爲令

四十四年乙丑會試命御史李邦珍鮑承蔭監視周弘祖

顧廷對場外搜檢 詔申嚴懷挾傳遞之禁犯者執送

法司問罪仍於禮部前枷號一月已邦珍等條上革弊

四事一試卷禮部印鈐送提調收領臨期舉人入場至

大門內驗票領以防洗改腳色及彼此交換之弊一請

畱朝覲二司及府縣官臨期督集所屬舉人照依省分

次第挨次點驗序進以防冒替之弊一舉人有不服搜

檢及不循序進如新規者輕則扶出重則叅奏以防喧

競抗違之弊一請增軍三百餘名嚴密搜檢場外仍選

差叅將官一員帶領官軍晝夜巡邏俟揭曉乃止以防

懷挾透漏之弊 詔皆允行已搜獲懷挾舉人十數名

國朝典彙卷二百三十八 科目
加號禮部前各杖發原籍爲民

命吏部左侍郎高拱侍讀學士胡正蒙主試初場進題
上以民之秉夷爲忌問少師階欲究治拱等階解釋之
乃已取中陳棟等四百人

廷試賜范應期李自華陳棟及第是歲讀卷工部尚書管
吏部左侍郎事董份亦用李春芳例也份遷禮部坐事
爲民與大學士袁煒以病故登科錄不載是歲進士陶
大順子允淳同科亦奇事也大順卽大莊前順天所發
回冒籍者也

隆慶元年直隸提學御史耿定向奏科場事宜一兩京鄉
試主考宜簡學行兼長者毋拘年資一兩京同考官宜
令廣取正備卷呈送主考如所取未稱責令再閱或付
別房覆校主考仍自行按閱落卷果有異材亟收錄之
毋避嫌輕棄一主考官止宜發初場試卷付同考分經
校閱二三場更易品訂毋專委一人致令偏重初場遺
真才積學之士一邇來經書時義體制大壞有浮蔓至
千餘字者宜嚴立程式一篇止許五百字以上六百字
以下違式者毋與謄錄一命兩京各省於揭曉之日以
中式舉人硃墨卷發提學官查驗鈐封送京府各布政
司解部以防僞濫一革去兩京應試監生字號與生員

一體彌封取中之數仍如舊額滿三十五名則止已而御史陳聯芳亦言重後場以羅實學及令兩京同考閱卷不必書各房字樣主考止以文字去取毋以考官爲額數分房爲次第禮部議覆俱允行之

浙江巡按御史王得春言各省舉人牌坊銀乃國家賓興盛典至嘉靖三十七年始以邊儲缺乏權議扣減似非昔人勸駕續食之義宜查先年例全給禮部議覆從之八月命諭德王希烈中允孫鋌主應天試初上用議者言兩京鄉試監生卷各革去皿字號於是南監中式僅數人虧舊額四分之三旣揭曉後考試官王希烈孫鋌

等至國學謁文廟而監生下第者數百人誼諫於門外伺希烈等出遮訴語甚不遜巡城御史操江都御史各使人呵止之久之方解事聞詔南京法司逮治其爲首沈應元等數人如法發遣祭酒呂調陽蒞任未幾且勿論守備魏國公徐鵬舉以聞變坐視奪祿米司業金達以鈐束不嚴奪俸二月監生編號如舊行

時翰林修撰丁士美右中允張四維主順天試取莊允中等百三十五人初場論語放鄭聲說者以高拱新鄭人蓋有所阿徇云

二年戊辰命大學士李春芳掌詹事府禮部尚書殷士儋

主會試取中田一儁等四百人

廷試賜羅萬化黃鳳翔趙志臯及第先是內閣所取李長春王家屏田一儁已定矣內旨忽於二甲前進呈卷用萬化等而李長春三人居二甲前是歲大學士陳以勤以子于陞通政使李一元以弟一中辭讀卷許之登科錄亦不列姓名

禮科給事中張鹵條陳科場事宜一曰嚴關防二曰覈供應三曰正文體四曰廣制額河南道御史王好問亦言號舍懷挾代替透露等四弊禮部覆奏上曰奸弊不法何以得真才監試御史其盡心嚴察不得寬縱

四年禮部覆提學御史周弘祖奏正士風五事一廣恩貢以實國學二申臥碑事例以整澆風三久任教職以收成效四責成有司以懲玩愒五試題須善惡並陳以革剽竊之習得旨開貢本爲求才各提學官其嚴選毋濫如廷試之日發回三名以上者提學官以不職論降一級

禮部覆南京御史王嘉賓奏請令今後試錄第錄中式士子之文考試官稍爲刪潤兩畿鄉試宜增設御史二人緝治懷挾諸弊得旨允行

命諭德丁士美修撰申時行主順天試洗馬侍講馬自強

侍讀陶大臨主應天試取李廷機吳汝倫各百五十人
以登極選貢增南北各十五名從孫鋌請也時南場有
賄進者後皆不得第云

順天府進鄉試錄葉有重複者 上以責提調考試官於
是府丞宋纁諭德丁士美修撰申時行各奪俸二月
時江西提學副使陳萬言以科舉校士遺落者悉詣巡按
御史劉思問求覆校幾四萬人思問與期會都司署中
旦日思問未至士爭門入駢雜喧亂都指揮王國光呵
叱之退相蹂踐死者六十餘人是歲鄉試南昌知縣劉
紹恤主彌封紹恤在縣中有素所獎拔士試而中者二
人士論譁然謂紹恤私二人從落卷搜出改洗冒中於
是南科道官請謫思問萬言罷紹恤并黜二生下吏禮
二部議思問無罪國光行撫臣逮問二人中式紹恤實
不私然不應招至門下以起事端其與萬言俱以不及
調用奏可

五年辛未命大學士張居正掌詹事禮部侍郎呂調陽主
會試取鄧以讚等四百人

廷試賜張元忭劉城鄧以讚等進士及第有差

麟川奏四

不深然不觀味至門下以狀事辭其與萬言身以不及

二涪蕭思問無罪固光存無臣數問二人中左路神童

長南林啟宮蕭蕭思問萬言蕭察與共禦二主下事

人士蕭蕭然蕭辭血深二人參察李對出題



